

新式標點

# 板橋全集

植青氏署



在板橋

贈  
先  
山房  
三

# 板橋詩鈔

興化鄭燮克柔氏著

## 鉅鹿之戰

懷王入關自戩，楚人太拙，秦人虎，殺人八萬，取漢中，江邊鬼哭酸風雨。項羽提戈來救趙，暴雷驚電連天掃，臣報君讎子報父，殺盡秦兵如殺草。戰酣氣盛聲喧呼，諸候壁上驚魂逋，項王何必爲天子，只此快戰千古無。千姦萬黠藏兇戾，曹操朱溫盡稱帝，何似英雄駿馬與美人，烏江過者皆流涕。

## 種菜歌爲常公延齡作

有明萬曆天啓間，時事壞爛生兇頑，羣賢就戮九千歲，宮中不復尊龍顏。烈皇帝起震而怒，練帛一條殪凶孺，天荒氣敗不可回，龜鼎潛移九廟仆。蒼谷先生開平嗣，屢疏交章稱天意，提將白刃守宮門，散盡黃金酬死事。都城陷沒走南邦，惡孽桐城馬貴陽，新王夜夜酣春夢，戊卒朝朝立曉霜。上方請劍長號睡，忠讜不聞城又破，虎口纔離二黠奸，狐舟欲覆江流大。

買田種菜作生涯，淚落春風迸野花，嬾尋舊第烏衣巷，怕看鐘山日暮霞。荷鋤負擔爲傭保，菜羹糲食隨荒草，時供麥飯孝陵前，一聲長哭松楸倒。家有賢媛魏國孫，甘貧茹苦破柴門，燒殘昔日鴛鴦錦，滌盡從前翡翠痕。一畦菜熟一畦種，時時汲水提春甕，玉纖牽斷井邊繩，茅棚壓匾釵梁鳳。幾年留穩先生死，含飯無資乞鄰里，天涯有客獨揮金，棺衾畫翣皆周視。人心不死古今然，欲往金陵問菜田，招魂何處孤臣墓，萬里春風哭杜鵑。

題雙美人圖

珮環搖動湘裙冷，俏風偷入羅衫領，美人相倚借餘溫，細語無聲親素頸。玉指尖纖指何許，似笑姮娥無伴侶，又似天邊笑薄雲，夜寒不得成濃雨。

自遣

嗇彼豐茲信不移，我于困頓已無辭，東狂入世猶嫌放，學拙論文尙厭奇。看月不妨人去盡，對花只恨酒來遲，笑他縑素求書輩，又要先生爛醉時。

山色

山色清晨望，虛無杳靄間，直愁和霧散，多分遣雲攀，流水澹然去，孤舟隨意還，漁家破蓑

笠，天肯令之開。

### 詩四言

夜殺其人，明坐其家，處分息事，咤衆毋譁。主人不知，託爲腹心，無奸不直，無淺不深。仁義之言，出于聖口，奸邪竊似，濟欲忘醜。播談忠孝，聲淒淚痛，詭譎賢明，况汝愚衆。當春不華，蓄意待秋，秋又不實，行將誰尤。茸蔓藏蛇，梧桐噉鳳，象分性別，各以類貢。况汝棘刺，鳴鵲避之，乃思鸞鳳，槁死不知。

求利于地，絲枲稼穡，求利于天，鋤慾植德。求利于物，網罟釣弋，求利于人，面曲背直，有禽其心，有獸其力，詆賢玩愚，寢危臥仄，天亦汝憐，大道不塞。

### 偶然作

英雄何必讀書史？直據血性爲文章，不仙不佛不賢聖，筆墨之外有主張。縱橫議論析時事，如醫療疾進藥方，名士之文深莽蒼，胸羅萬卷雜霸王，用之未必得實效，崇論閎議多慨慷。雕鰐魚鳥逐光景，風情亦足喜且狂，小儒之文何所長，抄經摘史餽釘強，玩其詞華頗赫爍，尋其義味無毫芒，弟頌其師客談說，居然拔軼登詞場，初驚旣鄙久蕭索，身存氣盛名先亡。

葦碑刻石臨大道，過者不讀倚壞牆。嗚呼！文章自古通造化，息心下意毋躁忙。

送友人焦山讀書

焦山須從象山渡，參差上下一江樹。高枝倒挽行雲住，低枝搏擊江濤怒。枯藤盤拏蛇走壁，怪石崢嶸鬼峽路。日落煙生江霧昏，微茫星火沿江村。忽然飛鏡出東海，萬里一碧開乾坤。夜悄山中更淒肅，鸛鶴無聲千樹禿。鄰屋時聞老僧咳，山魃遠在雲端哭。幾年不到大江濱，花枝鳥語春復春。抱書送爾入山去，雙峯覓我題詩處。

海陵劉烈婦歌

烈婦夫武舉從左良玉陣亡，無後，婦誓奉公姑，待其終年，卽自縊死。州人哀之，稱爲劉烈婦云。

濕雲壓臆燈欲死，少婦停梭拂衣起。夜慘心孤倦欹臥，沙塲夢入探閨裏。破甲殘旗裹血痕，手提敗鼓號冤魂。自云轉戰身陷沒，斷骸漂骨黃河奔。倉皇踣躄婦驚覺，羣犬亂吠秋籬根。深夜欲啼啼不得，淚珠迸落羅衾濕。抹去胭脂罷曉粧，翠翹雲鬢無顏色。凶問傳來敗散軍，果然與夢無差分。溫言緒語慰翁媼，幽閨裂破繡羅裙。椎心一哭數斗血，紙錢飄去迴秋雲。

柴門寂寞駐驢鬪，病婦把家門戶瘦，夜夜寒機達曙光，朝朝破井提鴛鴦，十畝荒田歲不收，一園花柳空如繡。翁歿嫗歿婦卽歿，宗祀無人妾何立？攬將皓頸委紅羅，要使芳魂覓沙磧，丈夫死國妻死夫，忠義不得轉呼吸，一念徘徊事則敗，包羞泉壤何嗟及。至今墳樹晚悲號，荒河白草秋原高，寒鴉孤棲夜不定，哀鳴向月求其曹。

### 揚州

畫舫乘春破曉煙，滿城絲管拂榆錢，千家養女先教曲，十里栽花算種田，雨過隋堤原不濕，風吹紅袖欲登仙，詞人久已傷頭白，酒暖香溫倍悄然。  
廿四橋邊草遶荒，新開小港透雷塘，畫樓隱隱煙霞遠，鐵板錚錚樹木涼，文字豈能傳太守，風流原不礙隋皇，量今酌古情何限，願借東風作小狂。  
西風又到洗粧樓，衰草連天落日愁，瓦礫數堆樵唱晚，涼雲幾片燕驚秋，繁華一刻人偏戀，嗚咽千年水不流，借問纍纍荒塚畔，幾人耕出玉搔頭。  
江上澄鮮秋水新，邗溝幾日雪迷津，千年戰伐百餘次，一歲變更何限人，盡把黃金通顯要，惟餘白眼到清貧，可憐道上饑寒子，昨日華堂臥錦茵。

曉行眞州道中

僮僕飄零不可尋，客途長伴一張琴，五更上馬披風露，曉月隨人出樹林，麥秀帶煙春郭迥，山光隔岸大江深，勞勞天地成何事，撲碎鞭梢爲苦吟。

寄許生雪江三首

詩去將吾意，書來見爾情，三年俄夢寐，數語若平生，雨細窗明火，鴉棲柳暗城，小樓良夜靜，還憶讀書聲。

金紫人間事，縹緲我輩需，閒吟聊免俗，極賤到爲儒，妙墨疑懸漏，雄才欲唾珠，時時盼霄漢，待爾入雲衢。

不捨江干趣，年來臥水村，雲揉山欲活，潮橫雨如奔，稻蟹乘秋熟，豚蹄佐酒渾，野人歡笑罷，買掉會相存。

贈石道士

樓殿玲瓏草木閒，洞簫吹徹碧雲間，歌成莫擬無投贈，新洗羊脂白玉環。

閒居

嬾慢從來應接疎，閉門掃地足閑居，荆妻拭硯磨新墨，弱女持牋索楷書，柿葉微霜千點赤，紗廚斜日半窗虛，江南大好秋蔬菜，紫筍紅薑煮鯽魚。

### 宗子相墓

寥落百花洲，老屋破還在，遠水如帶環，東風吹野菜。

### 七歌

鄭生三十無一營，學書學劍皆不成，市樓飲酒拉年少，終日擊鼓吹竽笙，今年父歿遣書賣，剩卷殘編看不快，爨下荒涼告絕薪，門前剝啄來催債，嗚呼一歌兮歌偏側，皇邊讀書讀不得

我生三歲我母無，叮嚀難割襁中孤，登牀索乳抱母臥，不知母歿還相呼，兒昔夜啼啼不已，阿母扶病隨啼起，婉轉喚撫兒熟眠，燈昏母咳寒窗裏，嗚呼二歌兮夜欲半，鴉棲不穩庭槐斷，無端涕泗橫闌干，思我後母心悲酸，十載持家足辛苦，使我不復憂饑寒，時缺一升半升米，兒怒飯少相觸抵，伏地啼呼面垢汙，母取衣衫爲湔洗，嗚呼三歌兮歌徬徨，北風獵獵吹我裳

有叔有叔偏愛姪，護短論長潛覆匿，倦書逃藥無事無，藏懷負背趨而逸。布衾單薄如空囊，敗絮零星兼臥惡。縱橫洩溺漫不省，就濕移乾叔夜醒。嗚呼四歌兮風蕭蕭，一天寒雨聞鷄號。幾年落拓向江海，謀事十事九事殆，長嘯一聲沽酒樓，背人獨自問興衰。枯蓬吹斷久無根，鄉心未盡思田園，千里還家到反怯，入門忸怩妻無言。嗚呼五歌兮頭髮豎，丈夫意氣閨房沮。我生二女復一兒，寒無絮絡饑無糜，啼號觸怒事鞭朴，心憐手軟翻成悲。蕭蕭夜雨盈階砌，空床破帳寒秋水，清晨那得餅餌持，誘以貪眠罷早起。嗚呼眼前兒女兮休呼爺，六歌未闕思離家。

種園先生是吾師，竹樓桐峯文字奇，十載鄉園共遊憩，壯心磊落無不爲。二子辭家弄筆墨，片語干人氣先塞，先生貧病老無兒，閉門僵臥桐陰北。嗚呼七歌兮浩縱橫，青天萬古終無情。

（種園先生陸震 竹樓王國棟 桐峯顧于觀）

### 哭惇兒五首

天荒食粥竟爲長，慚對吾兒泪數行，今日一匙澆汝飯，可能呼起更重嘗。  
歪角髭兒好戴花，也隨諸姊要盤鴉，於今寶鏡無顏色，一任朝光滿碧紗。  
墳草青青白水寒，孤魂小膽怯風湍，荒塗野鬼誅求慣，爲訴家貧楮鏹難。  
可有森嚴十地開，兒魂一去幾時回，啼號莫倚嬌憐態，遲剎非而父母來。  
蠟燭燒殘尙有灰，紙錢飄去作塵埃，浮圖似有三生說，未了前因好再來，

### 邨塾小諸徒

飄蓬幾載困青氈，忽忽邨居又一年，得句喜拈花葉寫，看書倦當枕頭眠，蕭騷易惹窮恨途，  
放蕩深慚學俸錢，欲買扁舟從釣叟，一竿春雨一蓑煙。

### 淮陰邊壽民葦間書屋

邊生結屋類蝸殼，忽開一窗洞寥廓，數枝蘆荻撐煙霜，一水明霞靜樓閣。夜寒星斗垂微茫，  
西風八幰搖燭光，隔岸微聞寒犬吠，幾摺吟髭更漏長。

項羽

已破章邯勢莫當，八千子弟赴咸陽，新安何苦坑秦卒，壩上焉能殺漢王，玉帳深宵悲駿馬，楚歌四面促紅粧，烏江水冷秋風急，寂寞野花開戰場。

鄴城

劃破寒雲漳水流，殘星畫角動譙樓，孤城旭日牛羊出，萬里新霜草木秋，銅雀荒涼遺瓦在，西陵風雨石人愁，分香一夕雄心盡，碑版仍題漢徹侯。

銅雀臺

銅雀臺十丈起掛秋星壓寒水，漳河之流去不已，曹氏風流亦可喜，西陵松柏是新栽，松下美人皆舊妓，當年供奉本無情，死後安能強哭聲，繡幃八尺催歌舞，嬾慢盤鴉鬢不成。若教賣展分香後，盡放民間作佳偶，他日都梁自檢燒，回首君恩淚霑袖。

泝水

泝水清且淺，沙礫明可數，漾漾浮輕波，悠悠匯遠浦，千山倒空青，亂石兀崖堵，我來恣游泳，誥歌懷往古，偏側井陘道，卒列不成伍，背水造奇謀，赤幟立趙土，韓信購左車，張耳

陋肺腑，何不赦陳餘，與之歸漢主。

### 易水

子房既有椎，漸離亦有筑，荆卿利匕首，三人徒碌碌，世濁無鳳麟，運否縱蛇螭，雷霆避其威，人謀焉得速，蕭蕭易水寒，悄悄燕丹哭，事急履虎尾，憤轅終敗輟，酒酣市上情，一往不可復。

### 贈甕山無方上人二首

山裏都城北，僧居御苑西，雨晴千嶂碧，雲起萬松低，天樂飄還細，官莎剪欲齊，菜人驅豆馬，歷歷俛長堤。

一見空塵俗，相思已十年，補衣仍帶綻，閒話亦深禪，煙雨江南夢，荒寒薊北田，閒來澆菜圃，日日引山泉。

### 追憶莫愁湖納涼

江上名湖號莫愁，納涼先報楚江秋，風從綠若梢頭響，雲向青山缺處流，尙憶羅襟霑竹露，可堪清夢隔沙鷗，遙憐新月黃昏後，團扇佳人正倚樓。

送職方員外孫丈歸田諱兆奎

先生六月江南去，敝裘秋風亦徑歸，鱸膾先嘗應憶我，蕨薇堪飽莫開扉。故人幾輩頭俱白，後學相看識者稀。淮海文章終自在，任渠披謁絳紗幃。

鶴兒灣畔藕花香，龍舌津邊稗稻黃，小艇霧中看日出，青錢柳下買魚膏，邨墟古廟紅牆立，天末孤雲白帶長，借取漁家新箸笠，一竿煙雨入滄浪。

嶧山

徐州五色土，乃在嶧山下，凸凹見青黃，崩裂墮赤赭，偃蹇十里石，蓄怒臥牛馬，苔斑古銅鑄，黑骨積鐵冶，砉然觸穹蒼，千峯搆雲廈，曲逕回腸盤，飛泉震雷瀉，古碑斷蟲魚，老屋頽甃瓦，秋河昏可竭，寒星摘盈把，悲鳥百羣叫，孤鶴萬年寡，結茅此間住，萬事焚可捨，山中古仙人，或有騎龍者。

山寺

山頂何年寺，寒牆補破雲，古鐘雀巢鈕，斷石薜成文，僧話從教譯，爐香久不焚，迴風吹柿葉，淒響正紛紛。

## 徐君墓

湛盧夜哭墳頭樹，天神百怪精靈聚，月射芙蓉冷露凝，霜寒釋琤銀蛇吐，殷殷時呼水底龍，熊羆欲化山頭虎，爲表延陵萬古心，忌負徐君三尺土。世人投贈不及身，百千賻布空爾情，季子抱恨刻心骨，區區掛劍徒虛名。眼前眷戀情難厭，死後相思空寄念，席上摩挲便贈之，一條秋水橫棺殮。

## 贈博也上人

閉門何處不深山，蝸舍無多八九間，人跡到稀春草綠，燕巢營定畫梁閒，黃泥小竈茶烹陸，白雨幽窗字學顏，獨有老僧無一事，水禽沙鳥聽闌關。

## 寄許衡山

江淮韻士許衡州，近日蕭疎似昔不，好事春泥修茗竈，多情小盃覆詩闌，食眠消減緣花瘦，鶯燕商量怨水流，我有無題新脫稿，寄君吟向小朱樓。

## 寄松風上人

豈有千山與萬山，別離何易來何難，一日一日似流水，他鄉故鄉空倚闌，雲補斷橋六月雨，

松扶古殿三時寒，筍脯茶油新麥飯，幾時猿鶴來同餐。

喜雨

宵來風雨撼柴扉，早起巡簷點滴稀，一逕煙雲蒸日出，滿船新綠買秧歸，田中水淺天光淨，陌上泥融燕子飛，共說今年秋稼好，碧湖紅稻鯉魚肥。

弘量上人精舍

森森秋濤湧樹根，西風落葉破柴門，蠻鴉日暮無人管，飛起前村入後邨，山門夜悄不能呼，冷燭秋船宿葦蒲，殘月半天霜氣重，曉鐘鷄唱滿東湖，

題畫

秋山秋樹秋水，蒼瘦禿落清駛，舊曾遊望依稀，渺渺雁行沙嘴。

悍吏

縣官編丁著圖甲，悍吏入村捉鵝鴨，縣官養老賜帛肉，悍吏沿村括稻穀，豺狼到處無虛過，不斷人喉抉人目，長官好善民已愁，況以不善司民牧，山田苦旱生草菅，水田浪闊聲潺潺，聖主深仁發天庾，悍吏貪勒爲刁奸，索通洶洶虎而翼，叫呼楚撻無甯刻，村中殺雞忙作食，

前村後村已屏息，嗚呼長吏定不知，知而故縱非人爲。

### 私刑惡

自魏忠賢拷掠羣賢，淫刑百出，其遺毒猶在人間，胥吏以慘掠取錢，官長或不知也，仁人君子有至痛焉。

官刑不敵私刑惡，掾吏搏人如豕搏，斬筋抉髓剔毛髮，督盜搜贓例苛虐，吼聲突地無人色，忽漫無聲四肢直，游魂蕩漾不得死，婉轉迴甦天地黑，本因凍餒迫爲非，又值姦刁取自肥，一絲一粒盡搜索，但憑皮骨當嚴威，纍纍妻女小兒童，拘囚繫械網一空，牽累無辜十七八，夜來鎖得鄰家翁，鄰家老翁年七十，白髮長椎敲更急，雷霆收聲怯吏威，雲昏雨黑蒼天泣。

### 撫孤行

十年夫歿局書簾，歲歲曬書抱書哭，縹緲破裂方錦紋，玉軸牙籤斷湘竹，婦婦義不賣藏書，况有孤雛是遺腹，四壁塗鴉噴不止，十日索墨五日紙，學俸無錢愧塾師，綫脚鉞頭勞十指，燈昏焰短空房黑，兒讀無多母長織，敗葉走地風沙沙，檢點兒眠聽曉鶉。

### 贈巨潭上人二首

山骨蒼寒壓古牆，壞廊拳曲入僧房，金錢十萬誰來施，多起樓臺占夕陽。  
墨磔鉛匙一兩三，半窗畫意寫江南，誰家絹素催人急，先向空中作遠嵐。  
寒煙島嶼淡孤邨，一縷霜華界瓦痕，睡足曉窗無一事，滿山晴日未開門。

別梅鑑上人

海陵南郭居人少，古樹斜陽破佛樓，一逕晚煙籬菊瘦，幾家黃葉荳棚秋，雲山有約憐狂客，  
鐘鼓無情老比丘，回首舊房留宿處，暗窗寒紙颯颯颼。

客揚州不得之西邨之作

自別青山負夙期，偶來相近輒相思，河橋尙欠年時酒，店壁還留醉後詩，落日無言秋屋冷，  
花枝有恨曉鶯癡，野人話我平生事，手種垂楊十丈絲。

再到西村

青山問我幾時歸？春雨山中長蕨薇，分付白雲留倦客，依然松竹滿柴扉，送花鄰女看都嫁，  
賣酒村翁興不違，好待秋風禾稼熟，更修老屋補斜暉。

除夕前一日上中尊汪夫子